



**PRIMEIRO
MINISTRO**

**ALOKUSAUN SUA ESELÉNSIA PRIMEIRU-MINISTRU
DR. RUI MARIA DE ARAÚJO
IHA BIBAN SERIMÓNIA ABERTURA
SEMINÁRIU KONA-BA AUTORIDADE MARÍTIMA**

Díli
22 fevereiru 2017

Eselénsia,

Señor Ministru Defeza
Kolega Membro Governu sira
Señora Embaixadora Estados Unidos Amérika iha Timor-Leste
Señor Embaixador husi paízes amigos
Señor Xefe-Estadu-Maiór-Jenerál Forsas Armadas nian
Señor Vise-Xefe-Estadu-Maiór-Jenerál Forsas Armadas nian
Señor Komandante Jerál PNTL nian

Exmo. Señor

Komandante Guarda Kosteira
Partisipante no Observador sira

Señora no Señor sira,

Ha'u hahú hodi hato'o obrigadu wa'in ba Estados Unidos Amérika, iha ninia Embaixadora iha Timor-Leste ba Señor Komandante Guarda Kosteira sira hosi *US Pacific Command*, ne'ebé fo ona sira nia tempu atu, hamutuk ho Governu Timor-Leste, liu hosi Gabinete Primeiru-Ministru no hosi Ministériu Defeza, hodi organiza semináriu ida ne'e ne'ebé ita bele fahe ba malun esperiéncia no vizaun hirak kona-ba atu harí sistema Autoridade Marítima ba Timor-Leste.

Timor-Leste nu'udar nasaun marítima ida, ne'ebé ita nia Zona Ekonómika Eskluziva boot liu besik dala lima kompara ho ita nia territóriu terrestre, maka tasi sai hanesan buat ida importante liu tan. Ita nia rain ne'e illa ida ne'ebé ninia parte tasi nian luan liu no ita mos hetan benefísiu tanba priviléjiu iha hetan fatin ida estratéjiku mos.

Tasi iha ninia valór ekonómiku la'os deit tanba esplorasau ninia rekursus hirak moris no la'os moris nian, maibé mos tanba poténsia iha importaun no esportaun sira liu hosi dalan tasi nian, ne'ebé maka representa besik 90% hosi ita nia atividade ekonómika sira. Tasi nu'udar rekursu ida ba ita nia diversifikasaun ekonómika no nune'e ba ita nia dezvoltimentu.

La'os ne'e deit, tasi mos representa seguransa no protesaun ba ita nia nasaun, representa defeza no seguransa mai ita nia país.

Hodi haré ba releváncia estratéjika tasi nian, maka tasi ne'e uluk kedas sai nu'udar prioridade no preokupasaun ida ne'ebé kontínua tuir ita bele haré iha dokumentu hirak estruturante hanesan Planu Estratéjiku Dezenvolvimentu no, hanesan uluk kedas, programa Governu nian sira.

Konseitu Estratéjiku kona-ba Defeza no Seguransa Nasional sai alvu ba diskusaun estudu durante tinan barak no konsulta oin-oin hamutuk ho parseiru dezvoltimentu sira no hamutuk ho organizaun sosiedade sivil, no naturalmente ho Konsellu Superiór Defeza no Seguransa, hodi hetan aprovasaun iha dezembru tinan kotuk ho baze ba Rezolusaun N.º 43/2016 lora 14 fulan dezembru.

Señora no Señor sira

Liu hosi ida ne'e, Timor-Leste hatur fila-fali iha Konseitu Estratéjiku Defeza no Seguransa Nasional nian, importánsia ne'ebé ita fo ona ba tasi no, harí sistema ida iha Autoridade Marítima nian hanesan pontu diskusaun ida hosi diskusaun hirak seluk ne'ebé konseitu ne'e hakarak implementa, hodi bele protéje no defende ita nia tasi sira.

Ita hasoru dezafiu no ameasa hirak ne'ebé hanehan ita hanesan kriminalidade organizada, esplorasau ilegal rekursu hirak moris no la'os moris, liu-liu peska ilegal ne'ebé la tama iha dokumentu no la hetan regulamentu, impaktu ambientál no ameasa hirak hasoru biodiversidade, no buat hirak seluk tan. Buat hirak ne'e hotu hamosu perda hirak substansiál ba ekonomia timor nian, tanba tasi maka esensiál mai ita nia kultura no lala'ok moris nian hodi reprezenta mos fonte ida vitál ba subsisténsia ba ita nia nasaun.

Timor-Leste konta ho tulun no koñesimentu hosi ninia parseiru sira iha atu harí ninia sistema Autoridade Marítima. Ita mos oras ne'e haka'as an atu kontribui ba seguransa marítima iha nível rejional no global – la'os deit liu hosi ninia kontributu sira ba dezenvolvimentu no iha adopta mekanizmu no instrumentu sira, maibe mos liu hosi dezenvolve ita nia kapasidade sira, hanesan ezemplu iha apoiu ba navegasaun no ba aplikasaun Direitu Internasional Tasi nian, no buat hirak seluk tan.

Kooperasaun iha matéria seguransa marítima ne'e fundamental haré ba dezafiu hirak kompleksu no, dala barak, transnacional no tanba ne'e maka buat hirak ne'e presija koalia hosi leten mai kraik no hamutuk.

Kooperasaun marítima iha rejiaun ida ne'e iha tinan sanulu hirak ikus ne'e hetok sai intensifika bainhira inisiativa bilaterál no multilaterál hetok sai multiplika.

Timor-Leste la'os exesaun no, la'os deit nia buka atu implementa ninia Konseitu Estratéjiku kona-ba Defeza no Seguransa Nasional liu hosi sistema ida Autoridade Marítima nian ne'ebé adekua ba nia, maibé nia mos hakarak atu kontribui, tuir nia bele, ba seguransa marítima iha ita nia rejiaun.

Semináriu ida ne'e iha papel ida importante iha prosesu ida ne'e. Ita hein katak debate sira bele hamosu rezultadu hirak, ne'ebé bele hametin liu tan konhecimentu no kompeténsia sira hosi ita nia espesialista sira iha matéria hirak ne'e no atu nune'e bele kontribuin duni hodi tulun ita bele komprende buat esensiál autoridade ida nian, liu-liu relasiona ho seguransa no protesaun marítima, ho governasaun no jestau marítima, no, importante liu, iha funsionamentu koordenasaun entre ajénsia barak-barak.

Hodi Governu nia naran, ha'u hakarak agradese dala ida tan ba Embaixada Estados Unidos América, tanba organiza hamutuk ona eventu ida ne'e, no mos ba ita nia parseiru sira hanesan Programa Kooperasaun ba Defeza (DCP) no ba GIZ Aid (Ajénsia Alemã ba Dezenvolvimentu) tanba sira nia apoiou ba eventu ida ne'e.

Agradese especial ba Komandante Guarda Kosteira sira ne'ebé hit-an ona hosi Havai mai iha mundu nia sorin balun ida ne'e atu fahe hamutuk ho ita sira nia esperiénsia, koñesimentu no kompeténsia sira.

Nune'e ha'u deklara ho ofisiál katak semináriu ida ne'e loke ona ho esperansa ita sai hetan rezultadu diak liu-liu ba ita timoroan sira.

Obrigadu barak.

22 fevereiru 2017

Dr. Rui Maria de Araújo